

李文恭公遺集

李文恭公奏議卷十六目錄

湘陰李星沅石梧著

男榛編次

江督

揀員請調清河縣知縣摺子

附奏佛喇晒國修士鐸德魏等在海門川沙傳經  
行教現飭查辦片子

揀員升署高資營都司摺子

附奏兼管河務礙難駐工片子

動項解濟甘肅軍需摺子

附奏運庫動項籌辦河南賑米數目片子

總兵中途患病據情陳請開缺摺子

泰屬各場秋收減薄請緩舊欠錢糧摺子

保舉堪勝陸路總兵摺子

特參蘇松鎮總兵林明瑞摺子

附奏委署蘇松鎮總兵片子

勒休推升湖北遠安營游擊摺子

附奏辦理徐州府屬外來匪徒片子

查辦六塘河隄事宜摺子

驛站船隻輪應修造摺子

新設鹽捕營都司未能依限引

見摺子

附奏催挽回空軍船片子

請將疎防匪徒之知縣革職畱任摺子

附奏嚴拏山東商虞廳滋事逸犯片子

知縣例應迴避揀員對調摺子

借項挑濬蓄薇河摺子

特參撤任通州分司運判趙祖玉革職嚴審摺子

附奏請飭新授蘇松鎮總兵沈河清迅赴新任片子

特參署邳州知州謝範卿摺子

附奏拏獲山東商虞廳滋事要犯歸案審辦片子

附奏開復江浦縣知縣李恩慶等處分片子

審擬署安徽當塗縣知縣吳昌晉摺子

審擬糾搶拒捕各犯摺子

籌辦防護海運情形摺子

冬季查閱沿江礮隄摺子

特參撫州營都司張得功等摺子

密陳考語摺子

附奏三省學政考試情形片子

彙核淮南北綱食各岸分銷鹽數摺子

附奏運庫動撥餉銀片子

附奏委員遞署提鎮片子

章練塘地處扼要請移駐官兵摺子

附奏籌防泖湖添設熟鐵礮位炸彈片子

各營借支米折餉銀分月扣還摺子

借項修築泖縣民堰埭壩各工摺子

揀員請調清河縣知縣摺子

奏爲揀員調補沿河要缺知縣恭摺奏祈

聖鑒事竊照清河縣知縣范傳勳因甄別案內

奏參革職所遺係沿河要缺衝繁疲難四項兼全必

須精明幹練熟悉地方河務之員方足以資治理

臣等於現任簡缺知縣及應補應升人員內逐加

遴選非現居要缺卽人地未宜一時實無合例之

員惟查有阜甯縣知縣屠元瑞年四十四歲順天



舉人乙未大挑復挑河工引

見奉

旨以河工知縣用欽此籤掣南河借署鹽城縣縣丞防  
汎出力奉

旨賞加升銜道光二十四年審辦迭劫拒捕戍官案内  
奉

旨以應升之缺卽行升用欽此

題補安東縣知縣二十六年七月初八日先行任事

八月初八日奉文准補因與山安同知譚祖同姻  
親廻避

奏准撤回畱省另補

題補阜甯縣知縣部行覆准尙未到任查該員年力  
富強才具明練曾經委署清河縣辦理裕如以之  
調補該縣知縣洵堪勝任其本任阜甯縣係兼三  
要缺今請調清河縣四項兼全最要之缺與例亦  
屬相符雖該員准補阜甯縣未經到任但前補安

東縣業已任事與初任知縣尙未到任並無俸次  
可計者有別惟厯俸未滿三年人地實在相需例  
得專摺具

奏據藩臬兩司會詳前來

臣

等往返札商意見相同

合無仰懇

聖恩俯念員缺緊要准以屠元瑞調補清河縣知縣於  
地方河工均有裨益如蒙

俞允該員係現任知縣請調知縣銜缺相當毋庸送部

引

見至調補要缺一切因公處分遵例毋庸核計該員係  
由安東縣迴避撤回補還阜甯縣今請調補清河  
縣知縣係屬初調應完罰俸銀兩飭令依限完繳  
造冊咨銷所遺阜甯縣員缺容另遴員請補謹會  
同江南河道總督臣潘錫恩合詞恭摺具

奏伏乞

皇上聖鑒訓示謹

李文恭公奏議

卷十六 江督

三

奏 道光二十七年十月初三日具

奏奉

硃批吏部議奏欽此

附奏吶喇晒國修士鐸德魏等在海門川沙傳經  
行教現飭查辦片子

再<sub>臣</sub>等先後接據署海門同知福祿堪稟吶喇晒  
國修士鐸德魏赴該廳中興鎮等處傳經行教忽  
往忽來又據川沙同知陳延恩稟報有夷人三名  
在該廳城隍廟講書宣教將教書逢人送給並聲  
明各向開導送回上海不能禁其復來海滋愚民  
易致煽惑各等情查道光二十四年兩廣督<sub>臣</sub>耆

英與佛嚠晒公使在粵會議內地學習天主教免  
罪章程奏奉

諭旨佛嚠晒及各外國習教之人止准其在通商五口  
地方建堂禮拜不得擅入內地傳教等因欽遵在案  
今海門川沙二處均非五口通商之地鐸德魏等  
越界傳教係與條約不符且其來往無定恐有漢  
奸假冒影射及匪徒哄誘各情業經臣等分飭嚴  
查防範靜以鎮之勸諭居民各安本分並密劄蘇

松太道戴齡就近查詢該夷領事令其恪遵

奏定章程妥爲管束以堅和好一面由臣李星沅咨

會兩廣督臣將如何照會該國公使查察禁止之

處酌核辦理所有據稟現辦情形理合附片具

奏伏乞

聖鑒訓示謹

奏奉

硃批另有旨欽此



揀員升署高資營都司摺子

奏爲揀員升署內河水師都司恭摺奏祈

聖鑒事竊准兵部咨陳栢齡升署京口右營遊擊所遺

高資營都司係內河水師題補之缺行文照例揀

選題補等因臣查高資營都司有巡緝江面援應

礮堤之責必須強幹熟悉始克勝任現在內河水

師守備內循例揀補一時乏人惟查有升署廟灣

營守備李德麟年三十八歲鎮江府丹徒縣人由

太湖右營兵丁出身歷拔太湖左營千總道光二

十三年二月經前督

臣

耆英委署京口右營守備

飭往圖山關守護木筏就筏操練兵丁是年六月

接受千總劄付二十四年八月經前督

臣

璧昌請

升廟灣營守備部覆准升行令給咨赴部計歷千

總俸次早滿二年因承辦江防事宜未能給咨本

年八月經

臣

閱演圖山關兵礮就近考驗得該員

年強技練熟悉江面情形歷獲盜梟各犯多名並

兩次帶兵防堵護署京口遊擊守備各務辦理均  
臻妥協洵爲水師中出色之員以之升署高資營  
都司實堪勝任查高資營都司原駐鎮江府丹徒  
縣高資港地方茲臣

奏明卽擬移駐江陰隨同京口副將調遣係該員隔  
府別營合例之缺惟該員現於升署守備案內給  
咨赴部引

見尙未接劄實授與例稍有未符溯查從前升署京口

左營守備劉長清未經實授復請升署洪湖營都司又狼山鎮標左營都司周震豫尙未引

見接劄實授復請升署狼山鎮標中營遊擊均蒙

恩准有案今請以守備李德麟升署都司核與歷准成案相符臣因人地相需援案奏請合無仰懇

聖恩俯准守備李德麟升署高資營都司於水師營伍均有裨益如蒙

俞允該員甫經引

見毋庸再行送部仍俟扣滿守備歷俸另請實授除飭  
取履歷咨部外謹會同江甯京口將軍臣裕瑞江  
南提督臣尤渤合詞恭摺具

奏伏乞

皇上聖鑒訓示謹

奏 道光二十七年十月初三日具  
奏奉

硃批另有旨欽此內閣奉

上諭李星沅等奏揀員升署內河水師都司一摺著照所請江南高資營都司員缺准其以李德麟升署仍俟扣滿守備歷俸另請實授該部知道欽此

附奏兼管河務碑難駐工片

再臣淮河臣咨開道光二十七年九月二十一日

奉

上諭兩江總督向有兼轄河務之責自道光二十二年起因他務未能兼顧嗣後仍著該督兼管以符舊制欽此祇悉之下悚惕彌深伏查兩江自辦理夷務經前督臣奏奉

諭旨暫不兼河臣亦一律遵守茲據河臣咨送摺稿聲

明舊例請

旨敕臣兼河欽奉

恩俞臣何敢稍存推卸惟向來督臣兼轄於河工三汛

及糧船重空兩運均至清江籌催現當上海通商  
江防緊要計清江相距水程一千餘里中間江湖  
修阻郵遞每至稽延若仍遠駐防河甚慮鞭長莫  
及且臣於河務夙未講求諳習焉敢強不知以爲  
知似應量爲變通隨時兼顧無須駐工日久一切



宣塞機宜勘驗款項河臣自有專責非臣力所能  
堪至在事文武各員人才之賢否工段之虛實必  
與河臣分任破除情面嚴加甄劾不受德而受怨  
不辭過而辭功以期實力同心維持風氣謹附片

陳

奏伏乞

聖鑒訓示謹

奏奉

硃批均係國家政務卿年力正強勉力爲之以副重寄

欽此

動項解濟甘肅軍需摺子

奏爲兩淮官運餘息查已墊用無存奉撥甘肅軍需  
改動正項解濟緣由恭摺奏祈

聖鑒事竊臣前准部咨喀什噶爾回匪滋擾

奏撥兩淮官運餘息銀三十三萬五千兩迅速解往  
甘肅糧臺備用等因當以軍需緊要未便延誤飛  
札運司籌解去後茲據兩淮運司但明倫呈報委  
員分批起解並將動放銀款詳請具

奏前來臣查官運餘息一款出於從前官運引內繳

存盈餘本非報部正項鹽課節年岸銷疲滯商課  
不繼並因辛丑綱折運以後雜項緩帶一切緊要  
解支及商捐報効庫存預籌經費不敷墊用復將  
官運餘息通融墊應隨墊隨收已收復墊並非商  
捐歸齊卽有實銀存庫節准部臣咨查均經各前  
督臣先後咨覆今准部文指撥如果本款實存內  
外同爲公用自當照數提解以充經費惟臣前過

揚州盤查運庫截至本年九月初五日止除正項  
候撥及專案起解之銅筋織造河工節省等銀外  
所存雜項共止銀五萬餘兩即使商運引內陸續  
徵收尙恐不敷支應實無前項餘息存銀堪以撥  
解軍需伏查道光十年以前運庫徵收商課正雜  
籠統存貯款目混淆往往那正墊雜歷屆清查案  
內多至虧佔銀五千餘萬兩皆因輾轉套搭以致  
積成鉅款迨經

欽差大臣議定章程嗣後正項貯庫專候報撥不許那  
移並經前督臣陶澍查明運庫積年牽混情形附  
片陳奏欽奉

硃批酌覈妥辦果能庫項一清無須那動正款方爲正  
辦欽此各前督臣凜遵

諭旨歷久支持計自辛卯起至丙午止十餘綱正項鹽  
課得以年清年款一洗從前積弊實賴有預籌經  
費官運餘息兩款轆轤挹注始獲正課無虧今若

將餘息提解充餉在部臣綜理度支原爲籌足軍需起見第前項銀兩運庫既非實貯勢必那及正款墊佔一開卽難收束是撥解餘息祇能暫濟一時而套搭漸滋恐不免仍蹈前轍臣受

恩深重具有天良實未敢專顧目前稍存掩飾故前於籌辦鹽務摺內首以慎重出納縷晰條

奏亦因庫款難以周轉預爲經畫之計現在奉撥餘息銀三十三萬五千兩本款查無存銀軍需又難

刻緩應卽在於運庫實存丙午綱正項鹽課銀內  
照數改動除飭據運司動放委解外合無仰懇

天恩俯念官運餘息無存

敕下戶部准於報撥項下作正開除以防流弊其官運  
餘息並預籌經費仍俟陸續徵還畱存運庫以備  
緊要解支隨時輪墊不致那動正項俾昭核實相  
應據實具

奏伏乞



皇上聖鑒訓示謹

奏 道光二十七年十月初三日具

奏奉

硃批戶部議奏欽此

附奏運庫動項籌辦河南賑米數目片子

再江蘇省籌辦河南賑濟米石先後接奉

諭旨業經臣將委員採買起運及安徽協撥銀兩截回  
緣由附片覆

奏所需米價脚費分飭江蘇兩藩司及兩淮運庫籌  
撥在案茲據運司但明倫詳稱奉撥米價事屬急  
需現存雜項不敷借墊查有司庫正項秋撥鹽課  
項下存銀尙多堪以借動銀八萬兩並准蘇州藩

司咨會委員分投採買就近卽赴運庫請領應行  
專款存貯照領支放查明動款銀數具詳請

奏前來臣查前項借動銀兩應俟河南省捐輸有存  
照數解還歸款除咨部查照外所有運庫動款銀  
數理合附陳伏乞

聖鑒謹

奏奉

硃批戶部知道欽此

總兵中途患病據情陳請開缺捐子

奏爲總兵中途患病據情懇

恩開缺調理並請

旨簡員補放以重職守事竊據新授廣東潮州鎮總兵  
余萬清遣家屬平安赴山陽縣呈稱該總兵進京  
陛見由長江東下因沿途感冒延醫診治至九月中旬  
行抵山陽縣境內忽爾吐血不止胸脇作痛病勢  
日增據醫家云風寒串入經絡氣血大虧非旦夕

所能見效現在飲食減少精神委頓未能前進呈  
請轉詳委驗

奏明開缺回籍醫調一俟就痊再圖報效等情由該  
縣知縣陳兆鵬具詳前來臣查余萬清年未五十  
由廣東城守副將於保舉堪勝案內領咨起程道  
光二十七年三月十七日奉

旨補授廣東潮州鎮總兵隨卽迎摺北上江西途次接  
奉

硃批著來見欽此茲因行至山陽縣境患病轉劇一時  
未能痊愈懇請開缺回籍除照例委員查驗將來  
病痊能否起用俟結覆到日另行核辦外相應據  
情奏懇

聖恩俯准余萬清回籍調理所遺廣東潮州鎮總兵員  
缺請

旨簡員補放以重職守謹繕摺具

奏伏乞

皇上聖鑒謹

奏 道光二十七年十月初三日具

奏奉

硃批已有旨欽此內閣奉

上諭李星沅奏總兵中途患病懇請開缺回籍調理一摺前授廣東潮州鎮總兵調補高州鎮總兵余萬清著准其開缺回籍調理欽此

泰屬各場秋收減薄請緩舊欠錢糧摺子

奏爲查明泰屬各場秋收減薄請緩舊欠錢糧以紓  
竈力恭摺奏祈

聖鑒事竊照泰州分司所屬富安等十一場坐落東臺  
興化鹽城阜甯四縣境內本年夏秋晴雨失調禾  
草受傷據各場大使先後稟報批飭運司巡道委  
員查勘茲據兩淮鹽運使但明倫會同淮揚淮海

二道詳據署泰州分司運判范維璿親督各委員



勘得富安豐梁埭東臺何埭丁溪草堰劉莊伍  
佑新與廟灣十一場委因入夏久旱入秋多雨蕩  
草禾糧收成較薄祇能將本年應徵道光二十六  
年新賦照常徵收及來年應徵二十七年分折價  
仍照例限起徵其餘舊欠各年折價錢糧應請概  
予緩徵等情稟由該司道體察情形核明詳請具  
奏前來臣查各該場本係積歉之區竈情困苦今復  
秋收減色若令新舊錢糧同時並納實屬力有未

逮合無仰懇

天恩俯准將富安等十一場本年麥後帶徵道光二十年  
五年分折價並秋後應行帶徵道光二十年分折  
價及原緩二十一二三四年積欠折價銀兩均  
請緩至來年秋後起每年帶徵一年由遠而近以  
紓竈力除飭查造應緩款冊另行咨部外謹會同  
江蘇巡撫臣陸建瀛合詞恭摺具

奏伏乞

皇上聖鑒謹

奏 道光二十七年十月十八日具

奏奉

硃批另有旨欽此內閣奉

上諭李星沅奏查明泰州所屬各場歉收請緩舊欠錢糧一摺江南泰州分司所屬富安等場本年夏秋晴雨失調禾草收成較薄竈情未免拮据加恩著照所請所有泰州分司所屬富安等十一場本年麥後應

帶徵道光二十五年分折價並秋後應帶徵二十年分折價及原緩二十一二三四等年積欠折價銀兩均著緩至來年秋後起每年帶徵一年由遠而近以紓體力該督卽刊刻謄黃徧行曉諭務使實惠均霑無任吏胥舞弊用副朕軫念歉區至意餘著照所擬辦理該部知道欽此

保舉堪勝陸路總兵摺子

奏爲遵

旨保舉堪勝陸路總兵之副將恭摺奏祈

聖鑒事竊准兵部咨道光二十七年三月十八日奉

上諭現在各省保舉堪勝陸路總兵人員將次用竣著  
各該督撫於副將內卽行遴選曉暢營務堪勝總兵  
者保奏數員送部引見候朕記名以備簡用欽此當

經前署督臣轉行欽遵去後嗣准漕臣楊殿邦保

舉漕標中軍副將阿隆阿安徽撫臣王植保舉安

慶協副將祥麟亦經先後會摺具

奏並准江西撫臣吳文鎔以江西省無員可保咨會

前來臣查總兵爲專闡大員必須訓練精嚴體用

兼備方足以資統率查有江甯城守協副將王鵬

飛年五十三歲直隸唐縣人由武進士三等待衛

選補佃湖營都司洵升泰州營遊擊歷獲私鹽十

七萬二千餘勦鹽犯一百餘名私船七十餘隻並

器械等件造冊咨部議叙准其不論俸滿卽行升  
用嗣由部擬補海州營參將節次拏獲鄰境海洋  
迭劫抗官拒捕盜匪李佩章等二十五名並擡鎗  
火藥等項經前督臣壁昌等會摺保

奏奉

上諭海州營參將王鵬飛著加恩賞戴花翎等因欽此  
卽經升補江甯城守協副將於道光二十六年正  
月到任是年九月受劄該員紀律嚴明勞績卓著

在江省副將中實爲得力可靠堪勝陸路總兵之  
任相應出具切實考語保

奏如蒙

俞允卽行給咨送部引

見恭候

欽定所有保舉副將堪勝陸路總兵緣由謹繕摺具  
奏伏乞

皇上聖鑒訓示謹



奏 道光二十七年十月十八日具

奏奉

硃批著送部引見該部知道欽此

特參蘇松鎮總兵林明瑞摺子

奏爲特參水師總兵巡洋不力託病遷延請

旨革任畱緝仰祈

聖鑒事竊照江省洋面年來盜劫風行經撫臣陸建瀛  
於兼署總督任內疊飭水師巡緝並奏奉

諭旨將蘇松鎮總兵林明瑞狼山鎮總兵臬陞均降爲  
三品頂帶仍帶革職畱任以示薄懲等因欽此臣自

抵任後復經嚴札勒拏因遊擊白炳忠推諉無能

指參革職枷號並與撫臣遴委文武幹員協同水師躡緝卽偕沿海營縣查禁接濟窩留一面飭撥沙船加派弁兵無分畛域扼要相機兜截先後

奏明在案嗣據崇明鎮縣稟獲事主黃春榮案內盜犯顧有富沈聚珍等二十名並盜船二隻又據川沙廳會同委員稟獲夷商婁麗華案內盜犯曹四老大張秀春張泳元等十一名又據狼右營稟獲事主魏金載案內盜犯王瀛高彭萬春等二名又

據江陰縣已獲梟匪李得全同案究出供認行劫  
顧永利龔源泰等盜犯林幅郎林澐生陸阿大等  
十八名均經分別飭審究擬仍飛飭水師三鎮將  
未獲各案依限緝拏不得再有延誤詎自九月以  
來接據崇明寶山稟報內洋外海盜案仍復不少  
而蘇松洋面失事比狼山福山爲多並據該鎮稟  
稱近在洋次舊症復發暫時旋署醫調等語閱之  
倍深憤恨查蘇松鎮總兵林明瑞身膺專閫在任

多年於海洋劫掠既不能防於先事今夏奏交部  
議復蒙

恩施逾量降頂革留當如何感激愧奮不避艱險勉思  
竭力自贖乃舊案既多未獲新案又復頻聞當此  
緝捕喫緊之時轉稱就醫回署並不親督舟師迅  
速截拏任意顛預怠緩支飾曷足以資統率相應  
據實

奏參請

旨將蘇松鎮總兵林明瑞卽行革任仍畱洋面協緝以爲託病遷延者戒所遺蘇松鎮總兵員缺請

旨迅賜簡放以重職守謹會同江蘇巡撫臣陸建瀛江

南提督臣尤渤合詞恭摺具

奏伏乞

皇上聖鑒訓示謹

奏 道光二十七年十月十八日具

奏奉

硃批另有旨欽此內閣奉

上諭李星沅奏請將巡洋不力之總兵革任畱緝一摺  
江南蘇松鎮總兵林明瑞於海洋劫掠多案既不能  
先事豫防迨經降頂革畱仍復不知愧奮以致舊案  
既多未獲新案又復頻仍輒敢稱疾回署並不竭力  
督拏當此捕務喫緊之時卽革任畱緝亦不足以資  
驅策林明瑞著卽革任飭令回籍該部知道欽此

附奏委署蘇松鎮總兵片子

再林明瑞久任水師未便因其託病遽令置身事  
外是以請

旨留緝而於海洋捕務實難望其有爲亟應先行委署  
查有准升京口副將田浩然本吳淞營參將係屬  
外海水師情形較爲熟練年力亦均強盛堪以暫  
委署理卽令管帶舟師出洋嚴緝各案務獲除檄  
飭遵照外理合附片陳明伏乞



聖鑒謹

奏

硃批覽欽此內閣奉

上諭江南蘇松鎮總兵員缺著沈河清補授欽此

勒休推升湖北遠安營遊擊摺子

奏爲推升遊擊年力漸衰請

旨勒令休致恭摺奏祈

聖鑒事竊照推升湖北遠安營遊擊江西羊角營都司

蔡廷元平日辦公頗知黽勉本年舉行

軍政經臣會同江西撫臣吳文鎔詳加考察以供職

無誤列爲平等造冊咨部在案茲該員來省請咨

臣核其履歷現年六十一歲當堂考驗騎射尙可

惟弓力太軟鎗礮亦生應對不甚明晰詢係沿途  
勞頓所致查遊擊爲專營將領有表率備弁之責  
似此語言蹇澀技藝平常足徵年力漸衰未敢因  
軍政甫經考核該員已升他省稍存遷就相應請

旨將推升湖北遠安營遊擊蔡廷元勒令休致以肅營  
伍此外如有衰庸不職之員容臣隨時察看據實

參劾謹會同江西巡撫臣吳文鎔恭摺具

奏伏乞


皇上聖鑒訓示謹

奏 道光二十七年十一月初四日具

奏奉

硃批所奏是另有旨欽此內閣奉

上諭李星沅奏請將年力漸衰之推升遊擊勒令休致  
一摺推升湖北遠安營遊擊江西羊角營都司蔡廷  
元技藝平常年力漸衰著卽勒令休致該部知道欽  
此



附奏辦理徐州府屬外來匪徒片子

再徐州府屬界連豫東向多伏莽之慮本年豫東收成歉薄匪徒出沒鄰境乘機竊劫勢所難免必須預爲之防經臣會同撫臣疊飭鎮道督率地方

文武知會豫東縣營無分畛域實力拏辦旋據碭山縣報獲行劫河南商虞廳署匪犯汪端黃心政二名並起獲元寶銀鏢三錠鎗械十六件又據邳

州稟獲匪犯董大沅解官湖等十四名睢甯縣稟

獲張沅同廉平等七名鎮標各營稟獲逃軍張三  
匪犯李大魁郝振凡郭效言等十九名並烏鎗鐵  
鞭刀劍賊衣等件均飭各歸各案嚴行審辦其應  
解歸鄰省者小心護解前進無稍疎虞現值冬令  
嚴寒巡防尤關緊要臣因徐州道新舊接卸之際  
復經遴委熟悉情形之候補道周燾前往會同鎮  
道親督營縣周厯要隘嚴密查拏並因徐屬邳州  
地方最爲喫重飭司改委桃源縣知縣姚維城馳

往署理責令上緊巡緝務期有犯必獲獲必重懲  
俾匪徒咸知做畏不至流爲鄰壑所有辦理緣由  
謹附片陳明伏乞

聖鑒謹

奏

硃批緝獲甚好欽此



查辦六塘河隄事宜摺子

奏爲籌議海沭等境六塘河隄經久事宜現飭查辦  
緣由恭摺奏祈

聖鑒事竊照海州沭陽等州縣六塘河隄各工經前督

臣 壁昌會摺

奏准借帑興辦本年四月內挑築完竣臣 陸建瀛於  
兼署督篆時遵

旨親往驗收恭摺覆

奏聲明長岸兩隄保固限滿後仍照舊章責成該處  
士民歲修在案茲臣等會查該河紆繞海州沐陽  
桃源清河安東五州縣境內袤延數百里周圍隄  
堰甚長均與農田水利運河修防大有關繫趁此  
工竣未久必應測量河水較定誌椿每交大汛各  
歸各境專派佐雜一員駐隄防守並分段設立隄  
長實力巡查如有應辦之工卽由隄長稟知汛員  
隨時轉報該管州縣親詣查勘或令就近業戶按

田出夫或照業食佃力之例應挑浚者乘時疏挑  
應修補者卽行補築分別情形酌量認真辦理其  
隄長各聽士民公舉由該州縣查取花名年貌造  
冊送道備查遇有更換一律照辦固不准藉端需  
索亦不許稍涉懈弛至隄工內外兩坡禦水均關  
喫重雖此時幫戢培厚誠恐沙土鬆浮日久易坍  
自當勸諭農民各就土性之宜沿隄多栽樹木使  
樹根日漸盤結保護隄身而地無空隙並免佔種

創挖之慮仍嚴禁隄頂搭棚扞葬及牲畜作踐等  
弊以期工程經久一勞永逸現經臣等分飭司道  
查明督屬遵辦除俟議覆至日另行咨部外相應  
將六塘河工竣後會籌經久事宜現飭查辦緣由  
謹合詞恭摺具

奏伏乞

皇上聖鑒訓示謹

奏 道光二十七年十一月初四日具

奏奉

硃批言之何難務要行之以實勉力爲之欽此

驛站船隻輪應修造摺子

奏爲驛站船隻輪應修造循例奏祈

聖鑒事竊照修造驛站船隻例應核實勘驗專摺具

奏茲據江蘇按察使宮慕久江甯鹽巡道積喇明阿  
會詳江甯省塢胡永華等應差沙船共七隻內輪  
屆中修者一船大修者六船又卜春來等應差宜  
樓船十九隻內輪屆小修者十二船大修者二船  
拆造者五船查明均已逾限委據江甯府江防同

知王夢齡逐船勘驗並經該道親詣覆驗或船身  
朽敝或縫口酥裂急應分別修造並據該道以前  
項沙宣等船專供滇省每年加運一一起京銅並  
江西辦解毛竹揚關京餉及撥解漕河餉銀等項  
差使從前出差船隻循去環來依限回塢近年河  
道阻滯守壩讓漕往返需時動輒一二年方能回  
塢茲當修造之期若不隨時修整必致乏船承應  
未便再議停緩應照案估計銀兩動款辦理詳請

具

奏前來臣查此項沙宜船隻專爲承運京銅餉鞘要  
差而設實屬刻不可緩之工所有輪應修造二十  
六船共估需工料銀二千九百一十六兩七錢一  
分九釐核與額編工料銀數相符應請循例卽在  
江甯藩庫雜項銀內動給興辦以資承應謹將各  
船上屆完工日期並估銀細數另繕清單恭呈

御覽除俟部覆至日將冊結咨部查核外謹恭摺具



奏伏乞

皇上聖鑒謹

奏 道光二十七年十一月初四日具  
奏奉

硃批工部議奏單併發欽此

新設鹽捕營都司未能依限引

見摺子

奏爲新設都司尙有經辦事件未能依限引

見循例恭摺具奏仰祈

聖鑒事竊准部咨欽奉

諭旨宋天麒准其升補江南鹽捕營都司照例送部引  
見欽此嗣據兩淮鹽運使但明倫詳稱鹽捕營都司

係新設之缺事屬創始非半年內所能完竣詳請

咨部展限給劄接准部覆以宋天麒奏補都司將  
屆一年應給咨赴部引

見如實有經辦要件必須加展應奏明辦理當卽轉行  
遵照去後茲據該運司但明倫以新設鹽捕營都  
司與尋常升任人員不同該都司請升雖已將屆  
一年而營制未盡事宜尙須逐細查明造冊詳咨  
礙難遽易生手詳請具

奏前來臣查升補鹽捕營都司宋天麒經辦新設營

伍頭緒紛繁若不寬予期限責成該員將應辦事  
宜悉心籌畫一手辦竣恐難經久盡善核與必須  
加展章程相符較尋常請升人員應行依限引

見者亦屬稍異相應請

旨敕部先行給與署劄竝開底缺一俟事竣卽速給咨

赴部引

見理合循例恭摺具

奏伏乞

皇上聖鑒謹

奏 道光二十七年十一月十六日具

奏奉

硃批兵部知道欽此

附奏催挽回空軍船片子

再前因徒陽運河水淺蘇浙回空軍船循案改由  
橫閘進口業經撫臣附片

奏明在案嗣恐各幫行走未能一律緊接復經臣飭  
委揀發遊擊慶麟執持令箭前赴揚州一帶嚴速  
提催茲據該遊擊稟報已於十一月十三日將蘇  
浙兩省起運軍船一千九百餘隻全數催出瓜洲  
渡江完竣惟查橫閘口門本年水勢甚小專候潮

汎暢旺陸續挽提據鎮江府摺報截至十一月十二日止已進京口及挽入橫閘幫船八百九十三隻核計未進口者船數尙多值茲天寒暑短亟須銜尾進閘庶免挂江守凍除再飛飭京口地方官會同在事文武委員極力上緊催挽迅速歸次外理合附片陳明伏乞

聖鑒謹

奏

硃批知道了欽此



請將疎防匪徒之知縣革職畱任摺子

奏爲疏防匪徒擄人勒贖請

旨將拏辦不力之知縣革職畱任勒限嚴緝恭摺

奏祈

聖鑒事竊臣等前因徐州府屬界連豫東時虞匪徒出沒節經會督該管鎮道飭屬認真拏辦旋據睢甯縣報獲張沅同各犯臣等又因時屆冬令適值徐

州道新舊交卸遴委候補道周燾前往督緝附片

奏明在案茲據睢甯縣詳前次報獲張沅同廉平王沅棟王汝溶李春淋時兆科章學任等七名外又續獲沈奎一名訊認與在逃之李馬等共夥十五人結捻滋事自道光二十七年八月初六日起至九月初四日先後訛擾該縣事主吳步雲等六家擄捉吳步雲之子吳和尚等八人得錢贖回等情臣等查張沅同各犯糾眾結捻於一月之間擄捉至六次勒贖至八人之多情罪甚重且恐結捻人

數所犯案數尙不止此該縣不能先事預防以致  
良民受害咎已難辭迨至獲犯八名仍未究明實  
係何人爲首何處結捻與豫東捻匪是否互相勾  
串其臨時起意擄捉凌虐又多誘諸在逃之犯顯  
係有心開脫實屬拏辦不力現當嚴緝捻匪之時  
未便因該縣獲犯業已過半稍事姑容據藩臬兩  
司轉據該管道府詳揭請參前來相應請

旨將署睢甯縣知縣賈鎮暫行革職畱任勒限緝拏仍

由臣李星沅行提張沅同等來省遴員研審確情  
究追黨夥按名指拏並密查該縣有無化大爲小  
彌縫遷就此外有無諱飾未報之案及地方營汛  
各員分別嚴查參辦務期有案必破有犯必懲以  
盡根株而安良善謹合詞恭摺具

奏伏乞

皇上聖鑒訓示謹

奏 道光二十七年十一月十六日具

奏奉

硃批另有旨欽此內閣奉

上諭李星沅等奏請將疏防匪徒擄人勒贖之知縣革職畱任勒限嚴緝一摺江蘇睢甯縣匪徒結捻肆擾一月之間擄捉至六次勒贖至八人之多該縣旣不能先事預防以致良民受害咎已難辭迨至獲犯八名仍未究明實情有心開脫未便因該縣獲犯過半稍事姑容署睢甯縣知縣賈鎮著暫行革職畱任勒

限緝拿餘著照所擬辦理該部知道欽此

附奏嚴拏山東商虞廳滋事逸犯片子

再臣承准軍機大臣字寄道光二十七年十一月  
初三日奉

上諭商虞通判署中被劫官銀衣物一案尙有籍隸江  
豫各逸犯已據崇恩開單咨會嚴拏著李星沅鄂順  
安遴委妥幹員弁查照單開各逸犯姓名逐一搜查  
務期按名弋獲迅卽解往山東省城交柏葰等歸案  
審辦毋許一名漏網等因欽此竝准山東撫臣崇恩

開單咨會前來除欽遵遴委幹練員弁上緊搜拏  
務獲報解外伏查此案先據碭山縣拏獲汪端黃  
心政二犯業經臣附片

奏明嗣又據碭山縣報獲李棠王懷亮二犯清河縣  
報獲王花一犯訊認夥劫屬實均卽解歸虞城縣  
審辦惟核山東撫臣所開逸犯清單並無汪端等  
五犯名姓內止張三胖張二張二禿子陳三翟三  
五人與汪端等所供相符餘俱互有參差因思該



犯等本皆無籍游民行蹤莫定其姓名籍貫每多  
一犯屢易卽各犯供指復多一案兩歧若僅執一  
以求或轉遂其狡脫現當漕船回空難保不涸蹟  
其間隨幫南下臣惟有督飭所屬不動聲色隨時  
隨處設法躡拏務將首要各犯按名檢獲解東審  
辦以仰副我

皇上除惡務盡之至意謹先附片覆

奏伏乞

聖鑒謹

奏

硃批嚴密查緝欽此

借項挑濬薔薇河摺子

奏爲海州薔薇河淤墊應挑循案借項攤徵歸款恭摺奏祈

聖鑒事竊海州境內西北有薔薇河一道宣洩青伊湖之水近年河身淤塞田畝被灾前據海州詳請借款興挑約需銀萬餘兩經前督臣彙入挑築海沭等州縣六塘河堤案内附摺

奏蒙

俞允興辦嗣因該河積水較多暫緩查丈迨後疏消涸  
出應行勘估均經附片

奏明一面札催司道委勘去後茲據江甯布政使傅  
繩勛淮海道顏以燠會詳稱海州薔薇河工接沐  
陽縣前後兩沐河其後沐河下注青伊湖北角由  
薔薇河入海前沐河由沐邑東南會通沙礮河至  
老堤頭分爲兩支南支紆入州境項冲河北支紆  
入州境高墟河接薔薇河入海實爲海沐宣洩要

道前據該州以州境水道自黃流經由薔薇河以致河身淤塞湖水漫溢民田據該處士民稟請勸辦詳奉

奏准在案現已積水消涸遵卽飭委卽補知府前江防同知王夢齡卽補通判孫沛葦左營守備談文貴會同海州直隸州毓彬親詣該處自青伊湖尾閘由薔薇河頭挨段逐細查勘至大夫亭止並海沐境內薔薇河上游接連港河尤爲緊要各段撥

節確切估挑口寬自一丈七尺二寸至五丈四尺  
不等底寬自一丈至四丈不等深一尺二寸至三  
尺不等其長一萬二千一百四十六丈連攔水壩  
四道計土方七萬零一百六十一方五分九釐並  
廂防風護埽以及車水人工共估需銀一萬四千  
一百九十二兩三錢一分八釐並據該州稟請趁  
此冬令水落農閒及時挑辦等情委係屬實覆查  
本年挑辦六塘河堤工竣案內計有節省銀八千

九十一兩八錢九分二釐堪以全數動撥不敷銀  
六千一百兩四錢二分六釐應請在於司庫地丁  
蘆課等款銀內借給趕辦分年攤徵還款詳請具  
奏前來臣等伏查海州薔薇河道淤墊應挑節經奏  
奉

上諭准辦茲既由司道委員會同該州確勘估計實需  
土方夫工銀一萬四千一百九十二兩三錢一分  
八釐係屬應辦之工合無仰懇

聖恩俯准在於六塘河節省銀內及司庫地丁蘆課等  
款內如數借給仍按田分年攤徵還款責成該州  
乘時趕緊挑辦工竣另委大員核實驗收不准草  
率偷減務俾水利民田均有裨益除飭取造攤徵  
估計各冊結另行照例詳辦外謹合詞恭摺具

奏伏乞

皇上聖鑒謹

奏 道光二十七年十一月十六日具



奏奉

硃批另有旨欽此內閣奉

上諭李星沅等奏應挑海州薔薇河借項攤徵歸款一摺江蘇海州薔薇河道淤墊自應及時挑辦所有估計實需土方夫工銀一萬四千一百九十二兩零著准其在於六塘河節省銀內及司庫地丁蘆課等款內如數借給仍按田分年照數攤徵還款責成該州乘時趕緊挑辦不准稍有草率偷減工竣後卽著潘

錫恩親往核實驗收該部知道欽此

特參撤任通州分司運判趙祖玉革職嚴審摺子  
奏爲官運夾私案內之撤任分司現訊供情狡展恭

摺

奏參請

旨革職嚴審以成信讞事竊臣前因官運引船夾帶私  
鹽請將通州分司運判趙祖玉撤任試用知事顏  
晉敏暫行革職提省審辦一案於道光二十七年

九月二十八日附片具

奏十月十四日欽奉

硃批必當從嚴查辦另有旨欽此同日奉到

上諭趙祖玉著卽行撤任顏晉敏著暫行革職均交該督提同船戶人等確切研訊根究鹽劬來厯按律從嚴懲辦至攬頭婁鑑雖已潛逃不難弋獲務將確情訊出毋任狡飾推卸倘有知情故縱情節卽行據實嚴參等因欽此當卽轉行欽遵飭提人卷解省並恐官鹽包內尙有重劬札委候補知府何森林前赴

揚州逐包稱掣亦多舛兩不符嗣據江都等縣將  
自行投案之攬頭婁鑑同船戶人等僉差押解前  
來卽經臣發委江甯布政使督同江甯府先行查  
訊茲據趙祖玉呈投親供以運出引鹽飭令攬頭  
雇用屯船裝載該攬頭等與江船戶勾串屯船夾  
私實非意料所及包內官鹽如照部祖申算適符  
申包舛重等語及訊攬頭婁鑑又供夾帶之鹽係  
江船戶向人買帶並未承認勾串伏查此項官運

臣衙門本無飭辦明文鹽船亦未全領護照至包外夾帶爲數甚鉅包內復舳兩不符趙祖玉職任分司原有緝私之責乃當私鹽破獲咎無可辭復敢曉辨飾非意存狡展難保無知情故縱串同推卸等弊據江甯布政使傅繩勛詳請革審前來相應據實

奏參請

旨將五品銜撤任通州分司運判趙祖玉卽行革職以

便督同嚴審按律懲辦俾成信讞臣謹會同江蘇

撫臣陸建瀛恭摺具

奏伏乞

皇上聖鑒訓示謹

奏 道光二十七年十二月初一日具

奏奉

硃批另有旨欽此內閣奉

上諭李星沅奏請將撤任分司革職嚴審一摺五品銜

撤任兩淮通州分司運判趙祖玉於官運引船夾帶私鹽重案事前既不能認真緝獲復敢於提訊時噤辨飾非意存狡展難保無知情故縱串同推卸情弊趙祖玉著卽革職交該督確切研訊按律懲辦欽此



附奏請飭新授蘇松鎮總兵沈河清迅赴新任片  
子  
再臣接准部咨欽奉

上諭江南蘇松鎮總兵員缺著沈河清補授欽此臣查  
沈河清係由福建閩安協副將

簡放總兵例應具摺請

覲往返數千里約計到任之期總在明春二三月間所  
轄蘇松洋面最關緊要近年以來頗多盜劫正當  
整飭緝捕且轉瞬卽行海運尤須及早肅清專閩

務期得力相應請

旨勅下該總兵兼程行走迅速赴任以專責成除咨會  
閩浙督臣並行該鎮遵照外理合附片陳明伏乞  
聖鑒訓示謹

奏奉

硃批另有旨欽此內閣奉

上諭李星沅奏總兵員缺緊要請飭迅速赴任等語沈  
河清著卽馳赴蘇松鎮總兵新任俟屆滿三年再行

奏請陞見欽此

特參署邳州知州謝範卿摺子

奏爲特參疏防捻匪竄入境內拒斃差役之署知州  
請

旨摘去頂帶勒限緝拏恭摺奏祈

聖鑒事竊臣等前因邳州地方緊要署知州謝範卿緝  
捕恐難得力改委桃源縣知縣姚維成前往署理  
附片

奏明在案茲據該署州謝範卿詳稱道光二十七年

十一月初三日有山東鄒城縣差役緝拏事主譙  
耀芳等案内匪犯薛葛來等追至州境沙埠莊地  
方薛葛來等將差役景四喬萬節趙方魁三人拒  
傷身死該署州聞信馳往會同鄒城縣四處搜拏  
犯已逃逸驗明景四等屍傷填格通詳適接署知  
州姚維成到任臣等前委候補道周燾亦卽前往  
督飭該員等會同蘭山鄒城營縣兵役拏獲擒匪  
薛葛來張嬉得張在廣劉毛惠金等二十三名又

格殺捻匪劉汰劉黑二名又魏麻子一名畏罪自

戕並訊據薛葛來張嬉得二犯供認拒殺譙耀芳

等及差役景四等不諱臣等查邳城縣事主譙耀

芳等被捻匪拒斃一案先據邳州及沭陽縣拏獲

郭從善蘇順劉幅鞍等九名解歸邳城縣審辦嗣

准山東省咨會協拏逸犯名單內有籍隸邳城之

薛葛來籍隸蘭山之魏麻子二名今該犯薛葛來

等膽敢因邳城縣追拏緊急竄入邳州境內拒殺

鄰城縣差役三命實屬罪大惡極該署州謝範卿  
屢經臣等嚴飭堵緝不能預先防範未便因事起  
倉猝及事後會獲正犯薛葛來等稍從寬貸相應  
請

旨將前署邳州知州候補知縣謝範卿摘去頂帶留於  
地方會同接署知州姚維成勒限緝拏餘犯務期  
全數弋獲盡法懲辦倘日久無獲卽行從嚴指參  
除飭將現獲各犯逐加確訊重擬究出未獲各犯

開單咨會兜拏並查明疏防武職另參外謹合詞  
恭摺具

奏伏乞

皇上聖鑒訓示謹

奏 道光二十七年十二月初一日具

奏奉

硃批另有旨欽此內閣奉

上諭李星沅等奏叅疏防捻匪入境拒捕之署知州一



摺江蘇前署邳州知州候補知縣謝範卿於東省捻  
匪竄入境內拒斃鄰境差役三命不能預先堵緝雖  
係事起倉猝竝經會獲正犯究屬疏於防範謝範卿  
著摘去頂戴畱於該地方會同接署知州姚維成勒  
限緝拏餘犯務期全數弋獲盡法懲辦倘限滿無獲  
卽著從嚴指參餘著照所擬辦理該部知道欽此

附奏拏獲山東商虞廳滋事要犯歸案審辦片子  
再臣前奉

諭旨飭拏商虞通判署中被劫一案逸犯解往山東省  
審辦當將已獲汪端等五犯並督屬嚴拏緣由附  
片覆

奏在案茲據安徽桐城縣稟報拏獲此案正盜張套  
兒卽張治套張汶兒卽張二狗並代爲推車之張  
如兒學唱之張受兒四名搜起贓銀一錠上鑿通

許縣字樣及短木棍等物訊據張套兒張汶兒供  
認夥搶商虞廳署銀兩衣物各分元寶二箇銀錠  
六箇不諱自應一併解赴山東歸案審辦除飛飭  
遵照併咨明

欽差戶部侍郎臣柏葭等仍一面督飭各屬上緊偵緝  
逸犯務獲解審外謹附片陳明伏乞

聖鑒謹

奏奉

硃批知道了欽此

附奏開復江浦縣知縣李恩慶等處分片子

再匪犯林發等糾眾肆搶一案前經臣陸建瀛將  
承緝文武員弁恭摺

奏參奉

旨江浦縣知縣李恩慶著先行革職暫畱本任浦口巡  
檢范正隆浦口營都司江春榮代理專汎干總陳永  
發協防外委徐綸庚著一併摘去頂帶勒令掩捕賊  
賊務獲等因欽此當經欽遵飭緝嗣據該縣李恩慶

會督營汎巡檢續獲柏起萬等二十名解省歸案  
現經<sub>臣</sub>等審擬具

奏伏查此案首夥各犯四十一名該員弁等先已獲  
犯十二名復於被參後不遺餘力會督營汎巡檢  
獲犯二十名共計先後獲犯三十二名計其獲犯  
日期尙在疏防限內僅止未獲逸犯九名緝捕尙  
知愧奮除浦口營都司江春榮已於

軍政案內劾參外可否仰懇

天恩俯准將江浦縣知縣李恩慶革職留任浦口巡檢  
范正隆摘去頂帶分別開復給還該員等防範不  
嚴致有失事仍請交部酌量議處其浦口營代理  
專汛千總事額外委陳永發協防外委徐綸庚  
均係無職任之弁亦請一併給還頂帶由臣李星  
沅提責二十棍責令勒拏逸犯之處臣等未敢擅  
便再浦口鎮係江浦縣管轄鎮外卽係六合縣境  
李恩慶初稟失事地方在交界處所係屬聲叙不

清尙非有意推諉合併陳明理合附片具

奏伏乞

聖鑒訓示謹

奏奉

硃批另有旨欽此內閣奉

上諭李星沅等奏請將緝獲搶犯之員弁開復處分給  
還頂戴等語江蘇江浦縣知縣李恩慶浦口巡檢范  
正隆浦口營代理專汛千總事額外委陳永發協



防外委徐綸庚前因疏防搶案降旨分別革職畱任  
摘去頂戴茲據奏稱該員弁等於被參後限內獲犯  
三十餘名尙知愧奮李恩慶著開復革職畱任處分  
范正隆陳永發徐綸庚著一併給還頂戴李恩慶范  
正隆防範不嚴致有失事著仍交部照例辦理該部  
知道欽此

審擬署安徽當塗縣知縣吳昌晉摺子

奏爲審明職官以娼爲妾致被誣告串拐按律分別  
定擬恭摺奏祈

聖鑒事竊照安徽試用知縣吳昌晉娶娼俞喜齡爲妾  
被俞張氏等呈控串拐一案經臣會摺

奏參欽奉

上諭吳昌晉以現任職官買娼爲妾實屬不知自愛且  
難保無倚官勒買詭計主持情事吳昌晉著卽革職

交該督嚴審確情照例定擬具奏等因欽此當經欽  
遵札行江甯藩司督同江甯府審辦去後茲據審  
明擬解前來臣親提研鞫緣吳昌晉籍隸江甯由  
舉人捐輸經費議叙知縣加知州銜分發安徽試  
用李家果卽李雲巢籍隸上元於道光十三年在  
安徽含山縣助賑議叙八品頂帶尙未請領執照  
俞喜齡本係陳姓之女幼無父母賣與俞張氏已  
故之子俞振圻爲義女先曾許嫁湖北人李玉亭

爲媳未婚而寡俞張氏旋因窮苦卽教令俞喜齡  
唱曲賣姦度日道光二十六年八月吳昌晉奉差  
來江便道省親適值其母吳孫氏生辰喚令俞喜  
齡至家唱曲俞喜齡與吳孫氏間談怨恨爲娼吳  
孫氏憫其無歸給予票錢二百千文令向俞張氏  
贖身俞張氏嫌少未允事已中止吳昌晉亦差竣  
回皖委署當塗縣事俞喜齡不願爲娼央懇昔存  
今故之姨母楊滕氏將吳孫氏所給票錢二百千

文赴縣呈請贖身批准飭傳俞張氏領錢俞張氏  
心仍不甘懷恨遷怒遂以吳昌晉串拐爲詞赴府  
呈控批縣查辦吳孫氏因俞張氏意在圖得重價  
俞喜齡既願贖身卽令夫姪吳小卿仍向俞張氏  
說合增給銀兩將俞喜齡贖出領回吳昌晉接得  
家信卽稟求其母送至當塗縣署收留爲妾俞張  
氏因吳孫氏係代俞喜齡贖身並非買爲子妾復  
向索擾吳孫氏又格外資助並令另立身契完結

二十七年二月李家果聞知俞喜齡曾受李姓之聘起意向吳昌晉詐錢捏稱俞喜齡曾許伊姪李有年爲妻藉俞張氏控吳昌晉串拐之案卽赴巡道衙門呈控批縣查詳吳昌晉亦以俞二指勒串告稟請提究訊供各執詳經臣據實奏參奉

旨將吳昌晉革職提解來省歷審不移臣親提覆訊詰無倚官勒買詭計主持情事應卽照例擬結此案吳昌晉因其母甫代妓女俞喜齡贖身卽行收贖

作妾迨被告發自遞親供又復縱言荒誕恬不知耻實屬不自愛惜未便因俞喜齡業已贖身卽同良論致滋避就吳昌晉應仍照文官娶妓爲妾律杖六十業經革職應毋庸議俞喜齡聽從賣娼應照縱姦律杖九十的決離吳無宗可歸當官嫁賣李家果卽李雲巢聞吳昌晉以妓爲妾起意圖詐捏詞上控贓未入手亦無口許數目應照不應重律杖八十旨認妓女爲姪媳卑鄙無耻革去八品

頂帶免其發落俞張氏教令俞喜齡爲娼又因俞喜齡赴縣呈請贖身圖得重價誣控吳昌晉串拐如所控得實吳昌晉應照和誘擬軍今審屬子虛律應反坐俞張氏除教令俞喜齡賣娼輕罪不議外合依和誘知情之人爲首者發極邊足四千里充軍例抵充軍役發極邊足四千里充軍照例收贖所得贖身及吳孫氏資助銀兩旣已另立爲妾文契卽屬身價飭追入官吳孫氏爲妓女贖身係



屬意存憐憫迨吳昌晉收畱爲妾不行阻止業經  
罪坐其子吳小卿說合贖身並非娶妾作媒俞二  
訛係俞張氏次子出外已久應與無干人等概免  
置議除供招咨部外臣謹會同江蘇巡撫臣陸建  
瀛安徽巡撫臣王植合詞恭摺具

奏伏乞

皇上聖鑒勅部議覆施行謹

奏 道光二十七年十二月初一日具

奏奉

硃批另有旨欽此內閣奉

上諭李星沅奏職官以娼爲妾致被誣告遵旨審明定擬一摺此案安徽已革試用知縣吳昌晉身任職官買娼爲妾雖訊無串拐情事究屬不知自愛有玷官箴著發往軍台効力贖罪餘著該部議奏欽此

審擬糾搶拒捕各犯摺子

奏爲拏獲糾眾持械搶奪拒捕之首夥各犯審明定擬卽將首犯恭請

王命先行正法專摺

奏祈

聖鑒事竊據江浦縣稟報安徽鳳陽府知府張錫蕃之家屬幕友在浦口鎮吳德大行內被匪搶奪拒捕估贓九十兩零獲犯林發等十七名一案經臣陸

建瀛在兼署總督任內恭摺

奏參欽奉

諭旨江浦縣知縣李恩慶著先行革職暫留本任浦口  
巡檢范正隆浦口營都司江春榮代理專汛千總陳  
永發協防外委徐綸庚著一併摘去頂帶勒令擒捕  
贓賊務獲等因欽此當經欽遵札行勒緝旋據續獲  
柏起萬等二十名飭委江甯藩司督同江甯府訊  
明先獲之十七名內有金三沈乾馬老二王明發

陳長發等五名僅與首犯林發認識並非同夥應  
卽省釋將林發等審供擬解前來臣李星沅督同  
在省司道親提研鞫緣林發柏起萬謝庭昇許丙  
榮聶靈之程錫公林桂沅張林王大愷方懷恂李  
三虎陳鼇陳萬榮黃華姚桂沈淙顯聶懋深丁有  
年陳善治王二虎林搖及王永標楊永發聶映清  
李大金陳大士金三錢仔張狗仔王朋仔費之和  
胡大川黃添來籍隸安徽來安及江浦六合等縣

林發前曾充當地保於道光二十五年因誤公斥革餘皆營趁度日向未爲匪犯案夏朝珍卽夏維周籍隸江浦由廩生捐監以吳德大出名在浦口鎮開張過載行道光二十七年四月二十八日安徽鳳陽府知府張錫蕃之家屬幕友由水路行抵浦口暫寓吳德大行內雇夫起旱三十日柏起萬謝庭昇許丙榮路遇林發聶靈之程錫公林桂沅閑談謝庭昇言及吳德大行內現有過客行李不

少林發起意藉查煙土爲名搶奪財物柏起萬等  
應允林發聶靈之程錫公林桂沉分投糾允現獲  
之張林王大愷方懷情李三虎陳鼇陳萬榮黃華  
姚桂沈淙顯聶湏深丁有年陳善治王二虎林搖  
及王永標楊永發聶映清李大金陳大士金三錢  
仔張狗仔王朋仔費之和監斃之胡大川黃添來  
未獲之聶有宏王明德蔡如方惟塾施二占幗祥  
金三盧二陳長生等共夥四十一人分執柴刀木

棍扁擔亦有徒手卽於是日下午從來安起身行  
至中途金三錢仔腹痛吐瀉張狗仔扶送回家王  
朋仔費之和行走落後不識路徑亦卽轉回林發  
等走至吳德大門首天色將明行門已開林發柏  
起萬張林王大愷方懷情李三虎陳鰲陳萬榮黃  
華姚桂胡大川黃添來方惟墊施二一齊進內陳  
大士在渡口看船餘在門外等候林發喝令柏起  
萬等將板箱木桶搶出院內劈開搜搶張錫蕃之



幕友吳傳珊上前喊捕被黃添來用刀背恐嚇致傷項頸林發等得賊而逸地保報縣勘緝夏朝珍因係監生矇充牙行恐被訊出查辦捏稱在浦口開張槽坊後屋租與吳德大開過載行被盜同時被劫等情赴巡道衙門具控希圖挾制經縣查無夏朝珍槽坊被劫情事由府詳革歸案旋據獲犯林發等起得原贓經臣陸建瀛奏奉

諭旨將江浦縣知縣李恩慶等分別革職摘頂勒緝茲

據提集各犯訊擬詳解臣李星沅逐加覆訊供悉前情嚴詰不移案無遁飾查例載搶奪財物聚至十人以上執持器械倚強肆掠者照糧船水手例分別首從定擬又糧船水手夥眾十人以上執持器械搶奪爲首照強盜律治罪爲從減一等又律載強盜已行得財者斬又例載地方匪棍假以查拏鴉片煙爲由肆行搶奪審實不分首從俱發邊遠充軍又共謀爲盜因患病及別故不行事後不

分贓者杖一百徒三年又奸棍豪紳憑空捏報盜劫藉以訛詐印捕官役照誣告人死罪未決律杖一百流三千里加徒役三年各等語此案林發糾夥四十一人以搜查鴉片爲由持械肆搶拒傷事主實屬兇暴眾著林發應從重照搶奪財物聚至十人以上執持器械照糧船水手夥眾十人以上執持器械搶奪爲首照強盜治罪例強盜已行得財者斬律擬斬立決查近來土匪假以搜查鴉片

爲由肆行搶奪之案層見疊出雖經隨時懲辦此風仍未止息該犯林發係已革地保膽敢糾夥至四十一人之多執持器械於天色將明未明行門甫開之際擁入肆掠拒傷事主巧避強盜重罪情尤兇詐浦口地方爲上江各省登陸大道若不從嚴懲辦匪徒罔知儆懼行旅將成畏途臣未敢稍事拘泥於審明後恭請

王命飭委江甯藩司傅繩勛督標中軍副將松安將該

犯林發鄉赴市曹卽行處斬仍傳首犯事地方懸  
竿示衆以昭炯戒柏起萬謝庭昇許丙榮聶靈之  
程錫公林桂沅張林王大愷方懷情李三虎陳裔  
陳萬榮黃華姚桂沈淙顯聶溇深丁有年陳善治  
王二虎林搖及王永標楊永發聶映清李大金陳  
大士等二十五犯聽從搶奪均請仍照地方匪棍  
假以查拏鴉片爲由肆行搶奪不分首從本例發  
邊遠充軍金三錢仔中途患病張狗仔扶送回家

王朋仔費之和行走落後中途折回事後均未分  
贓該四犯應請比照共謀爲盜因患病及他故不  
行事後不分贓者例各杖一百徒三年免刺夏朝  
珍以監生矇充牙行因行客被搶恐至審出問罪  
輒捏一夜連劫上控挾制殊屬刁詐第事出有因  
尙非憑空捏報應請照奸棍憑空捏報盜劫藉以  
訛詐印捕官役照誣告人死罪未決律杖一百流  
三千里加徒役三年例上量減一等總徒四年張

狗仔費之和沈淙顯聶湏深李大金聶映清程錫  
公據供親老丁單孀婦獨子犯係糾眾持械擾害  
行旅應毋庸查辦畱養與其餘軍徒各犯一併定  
地發配折責安置黃添來拒傷事主傷非金刃傷  
輕平復與聽糾同搶之胡大川業經在監病故應  
與訊無凌虐之刑禁人等均無庸議餘無知情容  
畱分贓得規包庇之人吳傳珊傷輕平復起贓給  
主未起追賠逸犯飭緝獲日另結吳德大牙行押

卷之十一 江督 六  
令閉歇夏朝珍監照追起緝銷除供招咨部外謹

合詞恭摺具

奏伏乞

皇上聖鑒敕部核覆施行謹

奏 道光二十七年十二月初一日具

奏奉

硃批刑部議奏欽此



籌辦防護海運情形摺子

奏爲揀派押送海運武職委員並籌辦防護情形恭摺具

奏仰祈

聖鑒事竊照蘇州松江太倉二府一州道光二十八年  
起運二十七年漕白糧米改由海運業經臣等酌  
定辦理章程先後具

奏並聲明督護武職出臣李星沅揀選派委其調兵

丁一千名沿途護送在案茲<sub>臣</sub>等公同商推道光六年海運係派副將參將各一員押運至天津交卸現在仍應照辦查有太湖協副將顧清漣升任吳淞營參將陳長泰均屬誠實強幹堪以派委督運所有海洋防護撥責成蘇松狼山福山三鎮總兵在於水師內挑選精兵一千名調撥將備管帶在吳淞口外取齊俟米船開行時由提督帶領提標右營內河水師在上海護送至吳淞口交福山

鎮總兵統領大隊師船護送至崇明縣十激洋面  
交蘇松鎮總兵統領押護候風放洋駛過佘山交  
狼山鎮總兵統領押護至山東省交界再由該省  
派撥舟師逐程護送本省原調兵一千名卽行撤  
退歸伍提督於吳淞口交替後卽統領例巡內洋  
兵船在吳淞川沙南滙等處洋面梭織巡邏爲福  
山鎮總兵援應福山鎮總兵於十激交替後卽統  
領例巡外洋兵船在江浙交界洋面與浙江定海

鎮總兵會哨肅清後路爲蘇松鎮總兵援應蘇松  
鎮總兵於佘山外交替後卽統領福山鎮總兵管  
帶之例巡外洋兵船在佘山附近巡哨爲狼山鎮  
總兵援應狼山鎮總兵至山東交替後卽督率東  
海廟灣等營各在所轄洋面哨巡爲山東省援應  
所派督運顧清漣陳長泰二員亦應仿照上屆海  
運成案卽坐米船北上毋庸另帶弁兵船隻以歸  
核實至江蘇省額設營船爲數無幾現於例派巡

洋兵船之外添調兵一千名船隻尙多不敷應責  
成蘇松太道督飭上海縣酌量添雇商船應用其  
雇資卽於海運經費內籌給如有貽悞惟該提鎮  
道縣是問再查近年以來江蘇洋面盜劫時聞前  
經臣等遴委候補知府王夢齡署撫標中軍參將  
恩長馳赴崇明會督鎮將實力追捕卽據福山鎮  
標中營遊擊劉長清在川沙洋面擒獲盜船一隻  
盜犯施茂等六名又據福山鎮標左營遊擊黃登

第在余山西北洋面遇見盜船開礮轟擊盜匪紛  
紛落海把總周明過船生擒盜犯高利能等二名  
兵丁張秀學等過船格殺盜匪多名搜獲器械原  
贓並所劫船照等物訊明盜犯施茂高利能等俱  
籍隸浙江定海等處並據供定海廳高亭地方有  
趙阿安又名趙蘭高結夥在洋伺劫預備拒捕等  
語業經臣等飛咨浙江撫臣密飭所屬協力兜拏  
務獲盡法嚴懲惟大海汪洋盜匪行蹤靡定若不

責成江浙水師合力勦捕甚慮此孽彼竄相應請  
旨勅下浙江撫臣嚴督定海鎮總兵統帶師船在於江  
浙交界洋面會同江蘇水師堵截盜匪北竄之路  
使之無隙可乘勢必舍舟歸巢搜拏較易得手並  
請

勅諭直隸山東督撫臣預調水師官兵各於交界處迎  
護海運米船以資保衛除先由臣等咨明外謹合  
詞恭摺具

奏伏乞

皇上聖鑒訓示謹

奏 道光二十七年十二月十四日具

奏奉

硃批另有旨欽此內閣奉

上諭李星沅等奏揀派武職押送海運並籌辦防護情形一摺江蘇蘇州松江太倉三屬漕糧明年改由海運必須洋面肅清方不至有疏虞著照所請准其做



照成案派委副將顧清漣參將陳長泰沿途護送由蘇松狼山福山三鎮總兵遞相迎護前後照應仍著提督統領兵船梭織巡邏並著梁寶常於海船放洋之始嚴督定海鎮總兵訥爾經額張澧中於海船入境之後預調將弁兵丁分別於交界處所接遞迎護倘有盜賊首尾扼要方不致此拏彼竄斷不可強分畛域各以本省所轄幸保無失便爲了事至所稱現獲各犯務卽從嚴懲辦毋稍寬縱餘俱著照所擬辦

理欽此

冬季查閱沿江礮隄摺子

奏爲冬季查閱沿江礮隄及後路兵礮完竣恭摺奏

祈

聖鑒事竊照大江南北兩岸礮隄各礮兵遵

旨按季輪演茲屆冬季演閱之期臣會同將軍臣裕瑞

副都統臣穆騰額於十一月初四日前往五龍山

沙洲圩兩處礮隄校閱滿漢官兵施放礮位如法

竝查照定章飭委福山鎮總兵孫雲鴻於十一月

二十一日自營起程二十八日閱看江陰之大小石灣劉聞沙三處礮隄十二月初四日閱看鎮江之北固山象山順江洲上下四處礮隄初七日閱看圖山關之大礮頭二礮頭東生洲三處礮隄初八日閱看三江口之固土洲西成洲兩處礮隄各該處土檔土墩均屬完固所派各路礮兵裝藥點放膽壯習熟其護礮及後路接應官兵亦俱步伐整齊烏鎗擡礮連環聲勢聯絡當由該鎮分別獎

賞核與臣秋間校閱情形大略相同臣仍諄飭各該將領督率經操備弁隨時隨處認真演練務使手法身法一律精益求精斷不准日久懈生虛應故事以仰副我

皇上慎重江防之至意謹會同江甯將軍臣裕瑞副都統臣穆騰額合詞具

奏伏乞

皇上聖鑒謹

奏 道光二十七年十二月十四日具

奏奉

硃批知道了欽此

特參撫州營都司張得功等摺子

奏爲特參老病庸懦員弁請

旨分別勒休革職恭摺奏祈

聖鑒事竊臣接准江西撫臣吳文鎔咨稱撫州營都司

張得功近來多病該營千總林時和庸懦無能咨

請撤任查辦前來臣查都司張得功履歷現年六

十二歲平日辦理營務尙無別項劣蹟惟近旣多

病卽難振作有爲至千總林時和遇事畏葸緝匪

不力臣亦確有訪聞均未便因

軍政甫經考核列入平等稍事姑容相應請

旨將江西撫州營都司張得功勒令休致撫州營千總

林時和卽行革職以肅戎行臣謹會同江西撫臣

吳文鎔合詞恭摺具

奏伏乞

皇上聖鑒訓示謹

奏 道光二十七年十二月十四日具



奏奉

硃批另有旨欽此內閣奉

上諭李星沅奏請將袁庸武職分別勒休革職一摺江西撫州營都司張得功年老多病難期振作著卽勒令休致撫州營千總林時和遇事畏葸緝匪不力著卽革職該部知道欽此

密陳考語摺子

奏爲循例密陳考語仰祈

聖鑒事竊照提鎮司道府等官例由總督於每年十二  
月出具切實考語密陳一次臣蒙

簡調兩江黽勉數月兢兢以得人爲先所轄三省地方  
幅員旣長寮屬亦衆如江蘇文武時多接晤猶虞  
言行不符若安徽江西各員才分更慮見聞不及  
爰就操守以窺其體設施以驗其用稟牘以覘其

識見輿論以測其聲名復與三撫臣往返函詢詳  
加考核雖營務與吏治本出兩途而程事與計功  
仍歸一理惟此破除情面互證參觀誠不敢信人  
之無欺要以嚴戒自欺者不敢上欺

君父現當二十七年應奏之期除蘇松鎮總兵沈河清  
廣信府知府耆齡尙未到任安慶府知府太平府  
知府尙未奉准調補例不加考外謹悉就臣所知  
各註考語密繕清單恭呈

御覽仍容臣隨時查察如有初終異轍名實相違者卽  
當據實指參以仰副我

聖主整肅官方之至意理合恭摺具

奏伏乞

皇上聖鑒謹

奏 道光二十七年十二月二十四日具

奏奉

硃批單片均爾中欽此

附奏三省學政考試情形片子

再學政聲名例應年終陳

奏一次臣查所轄三省自臣到任後江蘇學政李煌考過江甯淮安揚州通州等處生童去取公平士論翕服安徽學政羅惇衍考過廬州六安潁州等處生童江西學政孫葆元考過南昌撫州建昌甯都等處生童臣於夏間由滇來江路過江西安徽地方畱心訪察該學政等場規整肅竝無間言各

該學政等所延閱文幕友悉係隔省之人毫無弊  
竇臣仍隨時逐加訪察倘有始終易轍不公不勤  
或徇私壞法約束不嚴或精神疲憊不能振作自  
當欽遵本年欽奉

諭旨破除情面據實參奏斷不敢稍存徇隱所有學政  
考試情形理合循例附陳伏乞

聖鑒謹

奏

彙核淮南北綱食各岸分銷鹽數摺子

奏爲彙核淮南北綱食各岸道光二十六年分銷鹽  
總數仰祈

聖鑒事竊查兩淮銷引考核前於道光二年

奏准嗣後綱食各岸按年彙核奏報如有缺銷一律  
照例開參又淮北銷引因改行票鹽請免州縣督  
銷經部議准免其考核在案茲考核道光二十六  
年分銷數湖北湖南二省額銷淮南綱鹽七十七

萬九千九百二十六引內湖南省二十二萬三百  
十六引已照額全銷湖北省五十五萬九千六百  
十引銷過鹽五十一萬一千六百五十九引計缺  
銷鹽四萬七千九百五十一引又江西省額銷鹽  
二十七萬七千二百九十九引銷過鹽十五萬三  
千三百五十七引計缺銷鹽十二萬三千九百四  
十二引又江南安慶等府州共應銷淮南綱食引  
鹽三十三萬八千二百八十五引銷過鹽二十三



萬一千四百十一引計缺銷鹽十萬六千八百七

十四引又江南鳳陽等府州縣額共應銷淮北綱  
食引鹽二十九萬六千九百八十二引內除安徽

鳳陽潁州二府屬泗州六安二州屬河南汝甯府

屬光州屬江蘇淮安徐州二府屬海州屬共四十

州縣皆已改行票鹽按額溢銷應免考核外其餘

各州縣共應銷鹽八萬一千六百二十引內已銷

鹽六萬七千二百十三引計缺銷鹽一萬四千四

百七引據兩淮鹽運使但明倫會同江南鹽巡道  
積喇明阿將缺銷之湖北江西暨江安兩省各州  
縣分案造具經接督銷鹽道州縣各職名冊揭詳  
送前來伏查道光二十六年各岸銷數內惟湖南  
河南二省係屬按額全銷其湖北江西江安等省  
均未銷足總緣淮鹽行銷地面毘連閩浙川粵等  
省鄰私四面窺伺隨處皆能侵灌地方文武又復  
堵緝不嚴遂致銷引未能足額現經臣咨會湖廣

江西安徽各督撫臣督飭鹽道府州縣各顧考成  
認真設法疏銷一面毋分畛域實力緝私以期官  
引暢行礙務得有起色除將缺銷之各鹽道州縣  
職名冊揭咨部議處外所有道光二十六年分淮  
南北綱食各岸銷鹽總數理合恭摺具

奏伏乞

皇上聖鑒謹

奏 道光二十七年十二月二十二日具

奏奉

硃批該部議奏欽此

附奏運庫動撥餉銀片子

再臣前因兩淮奉撥官運餘息墊用無存

奏准改動正項鹽課案內經戶部查明秋撥動款尙不敷銀四十萬五千八百餘兩附片

奏令將原撥東三省官兵俸餉銀三十萬兩於秋撥以後續徵銀內湊解此外不敷銀兩一併籌畫將何時必可起解之處迅速奏覆等因咨行到臣當經行司查詳去後茲據兩淮鹽運使但明倫詳稱

查淮南丙午綱鹽課秋撥實存正項銀七十三萬九千餘兩又自秋撥後下半

奏銷報存候撥銀五十二萬四千餘兩共存銀一百二十六萬三千餘兩內先後動撥過南河預購歲料銀三萬兩解甘備用銀四十萬兩甘肅軍需銀三十三萬五千兩借發河南賑濟米價銀八萬兩又找解戊申下半河餉銀三萬兩共計銀八十七萬五千兩均經次第起解所贖東三省官兵俸餉

銀三十萬兩亦已照數扣存定於來歲正月十三  
至二十六等日分批委解起程不致稽誤餉需詳  
請具奏前來臣覆核無異除咨部查照外所有奉  
撥餉銀足敷動解緣由理合附片

奏覆伏乞

皇上聖鑒謹

奏

硃批戶部知道欽此

附奏委員遞署提鎮片子

奏爲委員遞署提督總兵印務恭摺奏祈

聖鑒事竊臣准提臣尤渤函知該提督已具摺奏請

賞假竝將摺稿錄寄前來臣查該提督在任五年廉以

律已嚴以馭下凡事身先作則教練有方實爲勇

敢可靠之員惟於二十六年秋間偶有感冒多服

攻散之品以致精神稍遜二十七年秋冬復染時

瘧雖經醫治痊可而兩腿酸麻艱於起立猶復親



身出洋督捕未獲各案經臣隨時專弁詢問旋據該提督函商擬請

賞假兩月稍資調理伏念受

恩深重不敢冒昧自陳五中實深焦灼臣因提督爲各營統率瞬值辦理海運應行督護出洋必令力疾從公設有貽誤轉非慎重之道當卽函覆該提督允爲代達下情囑其照例自行專摺懇

恩安心調養所有江南提督印務查有徐州鎮總兵來

英強幹精明堪以暫行署理其徐州鎮總兵印務  
查有江甯城守協副將王鵬飛誠實勇敢堪以遞  
署仍俟提臣尤渤兩月假滿察看情形再行分別  
辦理除檄飭遵照外謹恭摺具

奏伏乞

皇上聖鑒謹

奏 道光二十七年十二月二十二日具

奏奉

硃批另有旨欽此道光二十八年正月初八日奉

上諭李星沅奏提督患病懇請賞假一摺江南提督尤  
渤著賞假兩月善爲調理一俟病痊卽行回任江南  
提督印務著來英暫行署理餘著照所擬辦理該部  
知道欽此

章練塘地處扼要請移駐官兵摺子

奏爲章練塘地處扼要請移駐文武官兵以資巡緝  
恭摺奏祈

聖鑒事竊照蘇州松江二府交界地方湖河錯雜港汊  
紛歧匪徒最易出沒中有章練塘鎮係元和吳江  
青浦三縣接壤之區切近泖湖接連澱山湖處處  
可通舟楫尤爲盜賊淵藪前因盜犯顧雙僖等盤  
踞該處肆行劫搶蔓延蘇松二府各屬民商頗受

其害經前任督撫臣嚴拏重辦而自該處至元和等縣城池計一百二十里至三十六里不等卽分管汎地之縣丞巡檢等官駐紮處所亦離該鎮自七十里至三十餘里不等是文職印捕各官皆有鞭長莫及之勢至武職向隸提標前管管轄額設把總外委各一員兵丁六十八名分防九汎實在駐守章練塘者僅止把總一員兵丁五名相離該營遊擊守備駐紮處所亦有三十六里聲勢旣不

聯絡於彈壓巡防均難得力臣等與提臣尤渤往返函商竝飭藩臬兩司遴委幹員會同蘇松兩府一再查勘採訪輿論僉稱章練塘鎮實爲蘇松二府要隘必得移駐文武官兵巡邏稽察庶匪徒無從托足且水利攸關亦應擇要興辦因於通省佐雜各缺內詳加考核查有新陽縣縣丞駐紮城內竝無分防汛地事務較簡堪以移駐章練塘作爲元和吳江青浦三縣分防縣丞竝在元和縣角直

縣丞原管汛地內畫出十一圖吳江縣汾湖司巡  
檢原管汛地內畫出二圖青浦縣澱山司巡檢原  
管汛地內畫出四十七圖共六十圖均歸章練塘  
縣丞管轄湖河水利應與應革均責成該縣丞妥  
爲經理附近漁船亦歸該縣丞驗烙編號遇有失  
事卽將該縣丞參處定爲繁要調缺至新陽縣縣  
丞原係閑曹應卽改歸知縣兼管其額設差役無  
多今旣移改繁缺自應酌添弓兵查角直縣丞及

汾湖澱山兩巡檢汛地既多畫出應先儘該三員  
原有弓兵酌量抽撥如有不敷再於通省巡檢衙  
門均勻撥足以免顧此失彼所有防汛武職查現  
議撥歸章練塘縣丞管轄六十圖地方皆係提標  
前營汛地應請將該營守備亦移駐章練塘鎮再  
於提標五營內抽撥外委一員額外外委二員兵  
丁一百四十名隨同移駐在於泖湖澱山湖等處  
實力巡哨向來分防汛地專協職名悉仍舊制毋



庸另議更張所需縣丞守備衙署及移駐并兵房  
屋演武廳火藥局等項現據議買民房田地購料  
建造事因防禦盜賊興修水利且照時值給價民  
情皆踴躍樂從竝無勉強抑勒情弊第該處聚淤  
成壤土性卑濕房屋每易坍塌且恐貯備軍火難  
以經久擬多購碎石圍砌堅實爲一勞永逸之計  
如石有多餘卽交該縣丞守備擇地堆貯以備修  
築等工又查該處匪徒向多乘船伺劫官兵緝捕

非船不行而湖面灘大泥淤水勢深淺不一該匪等素習水性設遇追拏緊急逼至水淺處所卽皆棄船涉水踐淤而逃否則竄入大湖中洪官兵涉水踐淤旣非所長湖面汪洋追逐亦非易事現擬多備木筏交營收管平日代舟過渡一遇捕盜則於淺淤處所及河湖口門攔截援應其一切經費未敢請銷帑項查善後捐輸款內尙有盈餘銀兩應請卽於此內樽節核給原有新陽縣縣丞提標

前營守備衙署飭令估變湊用免其造冊報銷其餘未盡事宜如揀員調補鑄給鈐記及實在動用銀數容<sub>臣</sub>等次第

題奏咨部辦理<sub>臣</sub>等爲地方緊要起見謹會同江南提督<sub>臣</sub>尤渤恭摺具

奏伏乞

皇上聖鑒訓示謹

奏 道光二十七年十二月二十四日具

奏奉

硃批該部議奏片留中欽此

附奏籌防泲湖添設熟鐵礮位炸彈片子

再臣等承准軍機大臣密寄道光二十七年十月  
十二日奉

上諭前據李星沅等奏再行籌防泲湖等處情形一摺  
當交軍機大臣密議具奏茲據穆彰阿等悉心酌議  
如原奏所稱添購木餉有警則貯石鑿沈并先期豫  
備碎石及密存礮位安設重兵等事宜所議均屬周  
密俱著照該督等原擬辦理惟設防必期扼要而固

守尤在得人該督等務當於無事之時作有事之想  
勤加訓練總期有勇知方慎選人才俾共折衝禦侮  
穆彰阿等原摺著鈔給閱看等因欽此仰見

皇上籌備幾先

俯垂訓示伏讀之下欽感懍遵惟臣等前請於章練塘  
地方移駐文武官兵并購備木簰碎石皆係密摺

陳

奏從未一字宜露現在次第興辦該處地居腹裏離

上海稍遠外夷不致生疑而江蘇民情柔怯好作浮言若不將所以設防之由

奏請

明發

諭旨使之家喻戶曉難保不以訛傳訛是以臣等將章練塘移駐文武官員另行專摺具

奏祇候

訓示臣等復思制勝之道誠如

聖諭務兼地利人和而礮位一項尤宜精益求精有備無患查沿江各礮堤安設礮位不爲不多惟係生鐵鑄成體質重笨止可明列轟擊若欲擇要埋伏乘間出奇轉運實有所難因思熟鐵礮炸彈甚爲靈便百餘觔者致遠可抵千觔生鐵礮而彈子炸裂飛火四射猛迅倍常臣李星沅以護送海運追捕洋盜爲由現於省城雇匠打造擬演試合用卽自百餘觔至二三百觔上緊多爲製備醜就合體



炸彈分給各營嚴飭將備弁兵練熟裝藥下子施  
放之法以期得心應手足輔生鐵大礮所不及謹  
再附片密陳伏乞

聖鑒謹

奏

留中

各營借支米折餉銀分月扣還摺子

奏爲江甯八旂及督協各營循案借支米折餉銀分  
月扣還以資接濟仰祈

聖鑒事竊照旂綠各營官兵或因收歉或屆隆冬生計  
維艱歷經循案奏蒙

恩准借給兩月米折銀兩分限扣還在案茲據江甯布  
政司傅繩勛詳稱江甯八旂及督協各營官兵本  
年均因寒冬兵力拮据衣單食薄難以禦寒家口

衆多不敷養贍先後請借米折餉銀接濟內江甯  
八旂官兵借支兩月米折銀八千二百六十九兩  
九錢二分四釐從二十八年正月起分作十箇月  
扣還歸款督標中營借支銀一千三百六十八兩  
左營借支銀一千二百四兩江甯城守左營借支  
銀一千一百四十六兩右營借支銀一千一百八  
兩奇兵營借支銀一千二百一十六兩瓜洲營借  
支銀六百九十八兩浦口營借支銀七百二十六

兩梁陽營借支銀五百七十八兩均從二十八年  
三月起分作十箇月扣還歸款以上各該營所借  
餉折銀兩均經在於司庫地丁項下借支核明彙  
詳請

奏前來臣查江甯八旂及督協各營請借米折餉銀  
核與成案相符自應准其借給以濟兵艱除飭將  
所借銀兩分限扣還外謹會同江蘇巡撫臣陸建

瀛恭摺具

奏伏乞

皇上聖鑒再此外各營如有續行請借者容卽查明實  
在情形循案一體借給隨時咨部查考合併陳明  
謹

奏 道光二十七年十二月二十四日具

奏奉

硃批戶部知道欽此

借項修築沛縣民堰埽壩各工摺子

奏爲沛縣估辦民堰埽壩各工循案借項修築分年攤徵還款緣由恭摺奏祈

聖鑒事竊照徐州府屬沛縣境內夏鎮河河寨子民堰攸關漕運經由要道光二十五年二月內淮山東河臣鍾祥咨會該縣寨子民堰因二十四年雨水接漲被冲缺口已成坑塘卽據委員勘籌責成沛縣趕辦復經署沛縣知縣李映棻查勘運河水

勢過大致將運河西岸民堰劉昌莊池北竝常家  
口等處漫刷缺口五處河灘地面冲刷亦多均應  
補築計工長一百五十三丈五尺又應辦寨子民  
堰缺口夾壩各工計工長一百六十五丈二共估  
需料土夫工銀四千七百九十六兩一錢三分七  
釐又據沛縣知縣雷鴻恩勘得寨子迤北臨河灘  
面冲成大缺口二處應搶築埽壩一道計長二十  
五丈估需夫工椿料銀一千六百二十七兩九錢

三分九釐又二十六年十月內據署沛縣知縣馬  
軼羣以寨子一帶堰形卑矮漲水難資捍禦稟請  
自劉昌莊以北至三孔橋人家頭止加高工長一  
千一百二十七丈其寨子北首冲成缺口處所應  
靠河唇圈築與兩頭堰工接連共長一百五十二  
丈五尺六寸又填築常家口一帶缺口二處共長  
十八丈總共工長一千二百九十七丈五尺六寸  
估計土方銀四千一百六十五兩七錢一分一釐



又運河東岸有民便閘一座係洩東坡積水每值積水入河勢甚湍激擬請卽在該處創建雙孔減閘滾水石壩一座洩水入湖照兩孔估計每孔寬一丈八尺實留金門三丈六尺中砌雞心垛一座寬六尺裹頭及雁翅砌石十七層滾水壩砌石十一層以長河存水七尺爲度共估石料椿木錠扣灰米夫工等項銀二千九百八十二兩五錢八分二釐以上民堰各工通共估銀一萬三千五百七

十二兩三錢六分九釐據該縣等先後稟請借項  
興辦分年攤徵還款委據徐州府並銅山縣知縣  
姚文候補知縣張志周分別會勘明確取造估計  
冊結由委員確核無浮加結送府覆勘結轉並據  
前署徐州道顏以煥議請先行籌款發辦經前督  
臣壁昌批准飭司陸續酌放銀一萬四百四十九  
兩三錢四分二釐餘銀飭由府縣暫爲借墊另行  
裁給該縣李映棻先將寨子民堰及運河民堰缺

口修築未竣卸事交雷鴻恩接辦竝將續估埽壩  
一道趕築完工其署縣馬軼羣議請新築之寨子  
民堰一道竝創建雙孔減閘滾水石壩一座亦據  
分別照估辦竣由道飭委蕭南同知彭以竺暨徐  
州府查驗各工均屬照估築建竝無草率偷減情  
弊所用銀兩議請歸於民田項下攤徵還款出江  
甯布政使傅繩勛署徐州道韓椿核議會詳請

奏前來臣等伏查沛縣境內夏鎮迤河寨子民堰皆

洩水濟運要工既經委員會同勘籌被水冲刷殘缺卑矮必應修築加高竝捨築埽壩建造雙孔減開石壩等工以資宣洩而利漕行估需土方夫工銀兩由該管府道等遞核無浮議請籌款給辦工竣驗收如式應請准其在於司庫蘆課雜稅漕價等款內照數借給所借銀兩卽從道光二十八年上忙起在於該縣民田項下分作八年攤徵還款除飭取攤徵估計冊結照例詳辦外理合會摺具

奏伏乞

皇上聖鑒謹

奏 道光二十七年十二月二十四日具

奏奉

硃批另有旨欽此內閣奉

上諭李星沅等奏循案借項修築民堰埽壩各工分年攤徵還款一摺江蘇徐州府屬沛縣境內夏鎮修築運河寨子民堰竝搶築埽壩建造雙孔減閘石壩皆

係洩水濟運要工業經確實查估籌款給辦所有前  
後借墊土方夫工銀一萬三千五百餘兩著准其在  
於司庫蘆課雜稅漕價等款內照數借給所借銀兩  
卽自道光二十八年上忙起在於該縣民田項下分  
作八年攤徵還款該部知道欽此